



FOTOS PIXABEY.COM

Tgi profitescha da tgi?

DA SILVIA HOFMANN

■ **Mai embrid jau la ravgia che m'ha tschiffà cur ch'jau hai retschet in scriver dal rector da mes anteriur gimnasi. En quel supplitgava el da trametter daplì mattas en l'internat.** Fin oz era quai stà in internat per mats e nus mattas externas eran ina gruppetta en cumparegliaziun cun ils mats. Vilentà ha mai la motivaziun dal rector: Daplì mattas en las classas fetschian bain als mats, cun lur diligenza avessian ellas ina funcziun d'exempel e meglierassian il cumportament ed il clima en general. Ergo: Ils mats duessan profitar da las mattas. Questa funcziunalisaziun averta da mia schlattaina hai jau resenti sco offensiun. Quella m'ha vilentà talmain ch'jau hai declerà mia extrada immediata ord l'uniun da las anteriuras e dals anteriurs. La finala n'er'jau betg ida en il gimnasi per motivar mes collegas a meglras prestaziuns, mabain perquai ch'jau aveva mes agens talents e vuleva far insatge or da quels. Questa moda da pensar hai jau scuntrà frequentamain en il decurs da mia vita. Jau sun

vegnida elegida en gremis nua ch'ins era da l'idea ch'ina dunna pudess tuttina far bain. Savens er'jau «l'emprima dunna» u «la suletta dunna» e ma sentiva sco in animal da spezia rara sut observaziun speziala. Gea betg dir insatge tup, gea betg far insatge fallà.

Ma esser fitg lavurusa. Quai vegniva stimà dals gremis masculins. Oz sai jau: Ina singula dunna en in gremi dad umens è strusch da niz per las dunnas. Las dunnas «externas» na profiteschan nagut da quai. Pertge ina dunna suletta è in feagl da fighter per l'esteblichment. Dunnas sco umens profiteschan en la politica u en l'economia dals divers cumportaments e models da vita mo sche la cumpart d'ina schlattaina en in gremi munta ad almain 40 pertschient. Pir alura svanescha il status da l'exotic. La finamira fiss duas fin trais dunnas en la regenza grischuna u trais fin quatter dunnas en il cussegl federal. E betg nulla dunnas en la regenza grischuna u duas dunnas en il cussegl federal.

L'autura è deputada en il cussegl grond